

# Papru

## TITIUN

### papí áatramu

---

#### Papru Titiun áatramiania nu

**1** <sup>1</sup>Wikia Pápruitjai Yusa takarniurí. Tura Jesukrístu akatramuríntjai. Yús achikma ainia nú shuar niisha antukar Yúsan umirkarat tusan akatramuitjai. Shuar nuna nekaawar péñker wekasartatui. <sup>2</sup>Tura nú arant, nú shuarsha tuke iwiaaku pujusarat tusan étsereajai. Nú shuarnasha, nunñan najantsuk, “uwemtikrattajai” Yús tímiayi. Tura Niisha wáitruatniun tujintiawai. <sup>3</sup>Tura yamaikia, tsawant jeamtai, nuna nekaawarat tusa ii Yusrí uwemtikkiartinia nu, winia chichamur ujakarta tusa, winia akatturmiayi.

<sup>4</sup>Titiu, wi Yusna étserma umikiu asakmin winia uchirua áitkiasnak papin áateajme. Iis, iijíaj métek Yús nekas enentáimtatsjik. Yús waitnentrama asa shiir awajtamsati tusan wakerajme. Tura ii Aparí Yussha, ii Uuntri Jesukrístusha, Uwemtikkiartin ana nu, enentáimin imiatkincha awajtamsati, tajai.

<sup>5</sup>Wats, wi iwiarachmajna nu ame iwiarata tusan Kreta nunñanam ikiukchamkajam. Tura “ashí péprunam Yús-shuar írunmanum, Yús-shuaran wáinkiarat tusam shuar anaikiarta” tíchamkajam.

#### Yús-shuaran wáinin

<sup>6</sup>Yús-shuaran wáinin júnis atí. Niisha makuuchmin ti péñker wekasatí. Tura chikichík nuwentin átiniaiti. Tura ni uchirísha Yusna ártiniaiti. Tura shuar yajauch chicharsachmin niisha tutupnisan wekain ártiniaiti. <sup>7</sup>Enentáimprata. Yús-shuaran wáinin Yusna ana nuna wáinkiat tusa anaikiamuiti. Tuma asamtai nekas makuuchmin wekasatniuiti. Waantu enentáimtumsuk, kajetsuk, tura nampechu átiniaiti.

Chikichan waitkiau áchatniuiti. Tura ananma kuítrintin ajastaj tusa wakerukchatniuiti. <sup>8</sup>Antsu shuar ni jeen írar winiana nuna itiaatniuiti. Tura ashí péñker ana nuna wakerin, esetas enentáimin átiniaiti. Tura ju nunkanmaya akupeamuncha, núnisan Yús akupeamuncha umirkatniuiti. Tura nínki fímiastiniaiti. <sup>9</sup>Tura nú arantcha, chíkich shuáran péñker jintintrataj tusa tura Yus-Chichaman nakitin ánia nuna nupetkataj tusa, Yúsnumia nekas chichaman, nii unuimiátramiania nuyá kanakchatniuiti. <sup>10</sup>Nekaata. Umichu ti irunui. Niisha ántar chichau ásar ananmau ániawai. Israer-shuar weenam ti irunui nú shuar. <sup>11</sup>Niisha kuítian achiktaj tusar wakeruiniak, yajauch unuiniarchatniua nuna unuiniainiawai. Nuna túruiniak untsurí shuáran, ni írutkamurijjiaj yajauch enentáimtikiainiawai. Tuma asamtai auka, ni wené epetkatniuiti, ántar chichainiakui. <sup>12</sup>Warí, imia Krétanmaya chichaman etserin juna tíchamka: “Krétanmaya aentska tuke wáitrin ániawai. Tura nákitiat ti yurumin ániawai. Yajasma núnisan ániawai.” Nuna tíchamka. <sup>13-14</sup>Maa, niisha nékasan tímiayi. Nu tuma asamtai, Titiu, Israer-shuar ántar tuinia nuna, Yus-shuar anturkachartí tusam, tura nekas chichaman nakitiana nuna akupeamurín umirkachartí tusam, antsu Yúsán nekas umirkarat tusam, umichu shuar kakaram chicharkarta.

<sup>15</sup>Enentáimprata. Yus-shuarka, ni enentáí chamir ajasu ana nuka, ashí ni wainnia nuna péñkernak enentáimtawai. Tura chíkich shuar, Yúsán umirkachu asa, ni enentáí wapik asa, péñker ana nuna enentáimtustinian tujintiawai. Achapai enentáimiuk, péñkercha ana nuna “péñkeraiti” tawai. <sup>16</sup>Tura niisha “Yus-shuaraitjai” tuíniayatan, Yúsán umirtsuk niisháa túruiniawai. Tuma ásar mujímiaj ániawai niisha. Umichu ásar péñkeran túratniun penké tujintiainiawai.

### Péñker jintintiatin

**2** <sup>1</sup>Tura amesha, Titiu, péñker chicham etserkata. Yus-Chicham tátsuna nu etserkaip. <sup>2</sup>Antsu áishman katsunt Yusna ainia nu, ju jintintrata. Nampechu, nánkamas enentáimcha, esetas enentáimin arti. Yus tana nuna umirin tura anenain arti. Ni itíurchatrín Yúsán enentáimtusar katsuntin arti. <sup>3</sup>Tura núnismek nuwá katsunt Yusna ainia nusha ju jintintrata. Niisha núnisaran Yus-shuarti túramnia nuna péñker túrawartí. Tsanumin tura nampen áchartí. Antsu péñker wekasatniun unuinin arti. <sup>4</sup>Niisha yama nuatnakua nuna ni áishrín ni uchiríncha nekas aneetniun unuiniarartí. <sup>5</sup>Junasha jintintrartí. Esetas enentáimin, péñker wekain ártiniaiti. Ni takatrín péñker takastin ániawai. Ni áishrín umirin ártiniaiti. Tura waitnentin ártiniaiti. Yus-shuarcha Yus-Chichaman yajauch chicharkarain tusar túrawartiniaiti. “Tu jintintrarta” titiá.

<sup>6</sup>Nuyá, Titiu, natsa ánia nu “nánkamsar enentáimsarum wekasairap” titiá. <sup>7-8</sup>Tura amesha, Titiu, ashí tsawant péñker wekasatá. Nu natsa wi

túramun júkiar nunak túrawarmi tusam, nu túrata. Tura anturtamna nu “nekaschapitia” tiin tusam, esetsam enentáimsam, Yus-Chicham tana nu ímiatrusmek jintintiata. Nú túrakmiñkia, Yus-Chichaman nakitiana nu shuar “Tituu nánkamas chichaawai” títiáj tukamá, natsaamak tujintramkattawai.

<sup>9</sup>Takarín ainia nu, ni takartairin umirkarat tusam jintintrarta. “Shiir enentáimsarum, yajauch áimtsuk shiir umirkatarum” titiá.

<sup>10</sup>“Kasamkairap, tura anankawairap. Iis, péñker túrakrumka, takarniuitiatrum, shiir tura asarum ii Uwemtikramin Yusri chichamen shíiraiti, tu enentáimtikrattarme” titiá.

<sup>11</sup>Yus in waitnentrama asa ashí áentstin uwemtikramprataj tusa wakerutmaji. <sup>12</sup>Kame Yus waitnentrama asamtai, tunáa ana nu iniaisatniuitji, nu nékaji. Tura ju nunkanmayá yajauch ana nu wakerukchatniuitji. Tura antsu ju nunkanam pujayatrik esetsar enentáimsar ananma wekatsuk tuke tsawant Yus anear wekasatniuitji. <sup>13</sup>Túrar ii Yusri Jesukristu, uwemtikramajnia nu, imiá shiir iwiarnar tatí tusar nákastiniaitji. <sup>14</sup>Jesukristuka in jarutramkamiaji, ii tunaariniá uwemtikrampratajsa. Tura, Winia ajaras tuke enentáijiaj péñker túrawarat tusa, ii tunaarin japirtampramiaji.

<sup>15</sup>Tituu, anaikiamu asam arantutsuk nu jintintrata. Yajauch ana nuna túrawarain tusam chicharkarta. Péñkeran túruinia nu ikiakárta. Tura yajauch chichartukarain tusam tuke péñker wekasata.

### Yus-shuarti túratin

**3** <sup>1</sup>Tituu, shuar enentáimtikrarta. “Ashí akupin ainia nusha tura chikich uunt akupena nusha antukrum umirkatarum” titiá. ““Péñkeran túratin ana nuna páchitsuk túrattajai” títiniaitruma” titiá. <sup>2</sup>“Tsanumprairap, kajernaikairap, antsu shiir enentáimtunaistarum” titiá. Nanakaamantu enentáimtumatsuk ashí shuar péñker awajsatarum tusam tu jintintrarta. <sup>3</sup>Warí, iisha núnisrik Yus-shuar ajatsuk nánkamsar wekaimji, Yuska umirtsuk. Tura íwianch emetamu pempée wekaimji. Tura ii ayashí wakeramu tuke túriniuyaji. Tunaasha túriniuyaji. Chíkich atankittsar wakeriniuyaji. Chíkich shuar kajerkar tura nuamtaksha kajernainiuyaji. <sup>4</sup>Túrasha Yus in uwemtikkiartin ana nu, anenkratin asa, ni anenkrattairin ashí áentsun iniaktus in uwemtikrampramiaji. <sup>5</sup>Yus in waitnentrama asa, iikia júkesha péñker túrachma ain uwemtikrampramiaji. ¿Itiurak uwemtikrampramiaj? Ii tunaarin asakátrampramiaji, nijiaktinia áintsan. Tura Yusa Wakaní pujurtamkurin, ii iwiaakmarin yamarman amasmaji. <sup>6</sup>Jesukristu jakamujaj Yus in emeenturmatsuk ni Wakanin suramsamiaji. <sup>7</sup>In anenma asa nuna túramiayi. Nuñkia iisha yamaram awajsamu asar tuke iwiaaku átin, ti wakerimij nu íniuiti. <sup>8</sup>Nuka ti nekasaiti. Tuma asamtai Yúsan

umirkarmia nu, péñker túratniun tuke wakerukarat tusam tuke jintinki wetá. Wi tímiajna nu, péñker asamtai, ashí aents nuna nekaatniun atsumainiawai. <sup>9</sup>Shuar netse áujmatainiakui ameja pachisaip. Tura “aya winia úuntruk péñker áiniawai” tu chichasaip. Tura Israer-shuara akupkamurj ititurkit tusa shuar ti áujmatainiakui nusha pachisaip. Ántraiti nuka. Péñker wekasatniun yayatsui.

<sup>10</sup>Shuar tsanumprur yajauch enentáimtunaimtikiana nu chicharkata. Ántachkuin<sub>ñ</sub>kia ataksha chicharkata. Tura penké tujinkiamka jjiiki akupkata. <sup>11</sup>Nujaj juna nekaamniaitme: nuna tura asa awajiruiti. Tura ni tunaar<sub>ñ</sub>niñ jakattui.

### Papru wakerana nu

<sup>12</sup>Wisha Artemasan akatran akuptukchatjameash. Nin akupeachkunka Tíkikiun akuptuktatjame. Nii jeamtai amesha wari winitritia Nekapuris péprunam. Ju<sub>ñ</sub> Nekapurisnum yumí nantu asamtai seturan pujuttajai.

<sup>13</sup>Senas, chichaman ti unuimiaru pujana nu, amikiur Apurusjaj<sub>ñ</sub> jeamtai, nii atsumtsuk shiir weartí tusam, ame túratin jeamna nu yaiñta. <sup>14</sup>Iiní Yus-shuar ainia nusha péñker túratniun tura atsumainia nunasha yáin<sub>ñ</sub>tinian nekaawartí. Ántar pujusaraj<sub>ñ</sub> tusan nuna tajai.

<sup>15</sup>Ashí wiji<sub>ñ</sub>aj pujuinia nu amikmaatmainiawai. Tura ii amikr<sub>ñ</sub> Yus-shuar ainia nu amikmaatruata. Atumniasha Yus shiir yainmakat tusan wakerajrume. Nuke atí.